

Eqqissisimatitsinermut Avatangiisinullu ataatsimiititaliamit

ISUMALIUTISSIISSUT

Pineqarpoq;

**Kingusinnerpaamik 1. januar 2017 aallarnerfigalugu ukiuni tallimani misiligummik
teriannissat, tulukkat naajallu eqqissisimatinneqarunnaarallarnissat pillugu
Naalakkersuisut peqquneqarnissaannik Inatsisartut aaliangiiffigisassaattut siunnersuut.
Misileraanerup naareersimalernerani misileraanerup kingunerisaasa sunniutai pillugit
nalilersuiffiginerat saqqummiunneqassalluni, ilaatigut eqqissisimatitsinerup
atorunnaavissinnaanera pillugu nalilersuisoqassalluni.**

(Saqq.: Inatsisartunut ilaasortaq, Anthon Frederiksen, Partii Naleraq)

Siunnersuutip aappassaaneerneranut tunniunneqartoq

Suliaqarnermi ataatsimiititaliaq ukuninnga inuttaqarpoq:

Inatsisartunut ilaasortaq Kelly Berthelsen, Inuit Ataqatigiit , siulittaasoq
Inatsisartunut ilaasortaq Knud Kristiansen, Siumut, siulittaasup tullia
Inatsisartunut ilaasortaq Ineqi Kielsen, Siumut
Inatsisartunut ilaasortaq Villy Olsvig, Inuit Ataqatigiit
Inatsisartunut ilaasortaq Henrik Fleischer, Partii Naleraq

UKA 2016-ip nalaani ulloq 18. oktober 2016 siullermeerereernermi ataatsimiititaliap
siunnersuut misissorpaa.

1. Siunnersuutip imaa siunertaalu

Siunnersuuteqartup taavaa, uumasut amerliartuinnarnerat najugaqarfinnut
ippingiatornartuulersimasoq, uumasummi inuussutissarsiortunut akuttunngitsumik

ajogutaasarmata, tassanilu pineqarput aalisartut piniartullu kiisalu savaateqarfiit. Illoqarfiit nunaqarfiillu ilaanni tulukkat naajallu ukiuni kingullerni ima amerlitigisimapput, nakkutigineqartinnatik ukiumut piliniarnermi aalisakkanik neqinillu silami panertitsiniarneq ajornakusoortartoq, timmissammi nakkutigineqartigatik silaannarmi ikaanit nigortikkuminaattarmata.

Qeqertani eqqissisimatitaasuni Kitsissunnguani teriannissat angalaannartut ingammik imeqquataallat piaqqiorfiinut immikkut ajogutaasarput. Illoqarfinni nunaqarfinnilu sinerissamut qanittumi teriannissat angalaannartut takuneqartarputtaaq, maluginiarneqarlunilu teriannissat angalaartut inoqarfinnut qanilligaluttuinnarnerat. Tamanna inoqarfinni pineqartuni najugaqartunit perleroortoqalersinnaanera pissutigalugu aarlerinartorsiorsinnaapput.

Siunnersuuteqartup siunnersuutimigut siunertaraa uumasut pineqartut ukiuni tallimani misiliiiffiusumi eqqissisimatitsinissamut nalunaarummit atortitsiffiusumit peerneqarnissaat. Siunnersuuteqartup siunnersuutigaa, uumasunut pineqartunut kingusinnerpaamik 1. januar 2017 piffissap misiliiiffiusup Naalackersuisunit atorunnaarsinneqarnissaa, tamatumalu kingorna eqqissisimatitsinerup ataavartumik atorunnaarsinneqarnissaa periarfissaanersoq nalilerneqassasoq.

2. Siunnersuutip Inatsisartunit suliarineqarnera

Siunnersuutip Inatsisartuni siullermeerneqarnerani partiit amerlanerit siunnersuummut isumaqataapput, ataatsimiititaliamullu suliareqqitassanngortillugu. Partiit arlaqartut oqaaseqartuisa taavaat, uumasut allat soorlu nannut amaqqullu ilanngunneqaratarsinnaanerat, taakkumi ukiuni kingullerni inoqarfiit eqqaanni ingammik inuit angallaffigisartagaanni ajornartorsiutaasarsimmata.

Partiip ataatsip taavaa, aalisartut piniartullu peqatigiiffiisa tusarniarneqarnissaat periarfissinniarlugu atorunnaarsitsinissamut piffissaliineq kinguartinneqarsinnaasoq.

Naalackersuisunit siunnersuut itigartitsissutigineqarpoq, tunngavilersuutigineqarluni timmissanut teriannissanullu pineqartunut eqqissisimatitsinerup atorunnaarsinneqarnissaa maanna nalunaarutitigut periarfissaareersoq. Arlaatigut aallaaniartarfiit atuuttut pillugit atorunnaarsitsinissamut tikkuussisoqassappat uppernarsaaserlugulu nalunaarutitigut eqqissisimatitsinermut immikkut akuersissuteqarnissaq periarfissaavoq. Tamatuma saniatigut Naalackersuisut isumaqarputtaaq, uumasut nappaataannut tunngasutigut ulorianartorsiortitsisoqarpat imaluunniit kommuunimi allatigut aarlerinartorsiortitsisoqarpat, uumasut aalajangersimasut ilaannik imaluunniit timmissanik aalajangersimasumik eqqissisimatitsinerup atorunnaarsinneqarsinnaanera Naalackersuisunit

akuersissutigineqarsinnaasoq. Naalakkersuisuttaaq ilisimatitsipput timmissat pillugit nalunaarut iluarsartuuteqqillugu ingerlanneqartoq, tamatumani timmisartoqarfiit/qulimiguullit mittarfiisa eqqaavissuillu eqqaanni tulukkat naajallu ajoqutaanerini mannissarniarnissamut Aalisarnermut, Piniarnermut Nunalerinermullu Naalakkersuisoq immikkut akuersissuteqarsinnaanissaa pilersaarutigineqartoq.

3. Ataatsimiititaliap siunnersuummik suliaqarnera

Ataatsimiititaliap siunnersuummi suliaqarnerminut atatillugu aappassaaneerineqarnissaata UPA17-mut kinguartinneqarnissaa aalajangiuppaa. Ataatsimiititaliap isumaliutissiissummik suliaqarnerminut atatillugu taasissutissamut siunnersuummut attuumassuteqartut tassaasut, kommuunit, aalisartut piniartut peqatigiiffi, kattuffiilu taamatullu savaateqarfiit nunaatillillu peqatigiiffiisa tusarniaavigineqaqqaarnissaat, Piniarnermut Aalisarnermull Naalakkersuisumut suliap naammassineqarnissaanut innersuussuteqarpoq.

4. Tusarniaaneq

Tusarniaanermi susassaartut soorlu qulaani pineqartuni qulingiluaasuni arfineq marluk piffissamik sapaatip akunneranik 5-niik 7-nut tusarniaaffigineqartut sivitsorneqarneqareernerata kingorna akissuteqaateqarsimapput. Tassungalu ilutigitillugu Ataatsimiititaliap maluginiarniarpaa kommuunini sisamaasuni ataasiinnaq tusarniaanermut akissuteqaateqarsimammat. Ataatsimiititaliattaq maluginiarpaa susassaartut soqutigisaqaqatigiillu aalajangiiffigisassamut siunnersuummut soqutiginnillutik tusarniaanermut akissuteqaateqarsimanerat.

Akissuteqartut amerlanersaasa aalajangiiffigisassatut siunnersuutigineqartoq ilalernartillugu akuersaarpaat. Tusarniaanermi akissuteqartuni marlussuit aalajangiiffigisassatut siunnersuut taamaasiinnarlugu annerusumik minnerusumillu akuersaanngilaat, ilaatigullu timmissat eqqarsaatigalugit makku soorlu pisortanit eqqumaffigineqarnerunissaat siunnersuutigineqarluni; Uumasut neriniaaluttarnerat eqqaavissuarnullu containerit eqqarsaatigalugit eqqagassat illersorneqarsinnaasumik isumaginerisigut ajornartorsiut qaangerniarneqarsinnaasorineqarluni. Taamatullu sumiiffinni aalajangersimasunuinnaq atuunera kisimi pinnani soorlu assersuutigalugu siunnersuummi piffinni marluiit taaneqartut tassaasut: savaateqarfiit aamma Kitsissunnguit.

Ilanngullugu eqqaaneqartunut ilaavoq ukiut tallimat qaangiunnerisigut naliliisarnissaq akuttuallaassasoq, akulikinnerunissaalu naliilisoqartarnissaa kissaatigineqarluni.

5. Siunnersuutip aningaasaqarnikkut kingunissai



Inatsisartut suleriaasianni § 33, imm. 1-imi allassimavoq, aalajangiiffigisassatut siunnersuut tunngavilersugaassasoq siunnersuutillu aningaasatigut allaffissornikkullu kingunerisassai allaaserineqarsimassasut. Tamanna naapertorlugu siunnersuuteqartup siunnersuutip aningaasaqarnikkut kingunerisinnaasai allaaseralugillu ilimanarsisissimavai, tassaasut AC-mi fuldmægtigip ukiup sisamarterutaani sulisinneqarnera kr. 125.000-t nalinganut.

6. Ataatsimiititaliap inassutai

Ataatsimiititaliap isumalitissiisummik suliaqarnerminut atatillugu Naalakkersuisut kaammattorumavaai, terianniisat pamiuisa aammalu tulukkat naajallu isigaasa tunisaanissaanut aqqutissiuunneqarnissaanut misissueqqullugit.

Taamaalilluni ataatsimiititaliap isumaqatigiittup siunnersuut akuerineqassasoq inassutigaa.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.


Kelly Berthelsen, siulittaasoq
Knud Kristiansen
Ineqi Kielsen
Villy Olsvig
Henrik Fleischer